

totum post Deum vestre maiestati ascribimus et vestra audacia et robore id habere et obtinere cognoscimus. Si ergo terrorem qui valde metuendus est inimicis et infidelibus regni decenter infertis et veraces amicos atque fideles pia recompensatione mulcetis strennue, iuste et honeste agitis. Scriptum quippe est in proverbiiis Salomonis: *Sicut fremitus leonis, sic et terror regis; et sicut ros super herbam, sic et hilaritas eius.* Quo quidem rore nos Dei gratia benivolentie vestre largitate perfusi, prospere agimus, viriliter incedimus, super hostes victores existimus. Confidenter igitur eructat cor nostrum verbum bonum et opera nostra regi dicimus ac multa maiora per gratiam Dei et vestram vobis enarrare poterimus. Accingere ergo gladio super femur tuum, potentissime, et deducat te mirabiliter dextera tua propter veritatem et mansuetudinem et iusticiam, quod multiplicitas intercessorum postulat et expectat. Utinam de vobis in proximo condigno concentu canere possit conscio nostra, quamquam Dei filio versiculis hic psalmi decentius conveniat: *Domine in virtute tua laetabitur¹ rex; et super salutare tuum exultabit vehementer.* Corde simul et ore vobis loquentes supplicamus, quatenus de servicio regni et vestro nobis precipiatis, qui parati sumus in omnibus obsequi vobis. Gratias autem Deo agimus vestreque mansuetudini, quia captos nostros liberare voluistis, et non audierunt vos inimici nostri, sed reddidit eos nobis cum nostro honore virtus omnipotentis et habemus multos ex illis, sicut nosse poteritis a fidelibus vestris. Foderunt quidem foveam, paraverunt pedicam et ipsi inciderunt in eam Deo gratias. Amen.

1) Von 'laet. — vehementer' nur Anfangsbuchstaben c.